

sia'ũ'ũraisa

siriatũnũlũna, ihlaisa pualisũhla sitakuamia, ucaniika kuacahliaku
malitũnũlũ.

mangusipiaku maru miacaciacihli pihlingina, aariaari ina'ana
takulangũlangu taku'i'iarũ, aariaari pasapulatu, ucaniika kuakutalaku
talakakukua, aariaari hlipahlivingikuna, aanũ uuru hla camaina, ngasa
hliuvura? mairahlu ina'ana, ucaniika kuakuacahlia manau.

hlitakulangũlanguaisa avavu uuru hla camai, kuucani kualiatũnũlũ,
karũkũhlũmana puatakuliacu aanũ, kunaku atũhlũngu masasahli
rahlũngu taucu'u ina'ana, musa tumalũlũvũ ina'ana rumurumu 'ũcũrũ.

ulavaisa macahliacuaku, kani'i ina'ana macuisa ma siangusipa. kana'a
ihlaisa kuasapuaũ ucani ari ,ari kana'a aracarimicua ina'ana, hlimatasa'ai
tatara kuacũka, ihlakucua takuakucu ta'iarasalia, pu'a hlatũngu, avavu uuru,
hlumavu, hlumamusu sasaruana, hlitakumiana tamuucu mipulatu.
atũhlũngu hlitakimia ina'ana, ulavaisa macahliacuaku hlipasalangũlangu,
macahlia hliaparapihla ihlakua ina'a, marapihli ihlaku, kani'i, takuliacua
tikiku maci micikiri ihlaku. ahliki'ai mũmũa angahli ihlakuna
atũahlũ siacalaiku hla masasangarũ, tuahlũ mũmũa uvuruisana siacalai.

marua cucu'u amihla “ hlivuraisa ihlau ina'ana, ma siaupangũna
kuautuahlũ pirakucuisana. ” mairahlu kani'ina, manikia pakaranga tikiu
uvuraisana, hla mairahlu kupataingalũ hlivuraisa siacalaia. maniki aunana ia
avurikuisana, ta'iaraisaka inaku piratumuhlu ihlaku ina'ana. macuaku
marakaka ia, ngahlaisa ma patikiku apasamanganũ ihlaku? maci
takulaicu tikiku ia, ngahlaisa ma patikiku tumahlisasangalũ ihlaku?
macuaku pausakũsakiri ia, ngahlaisa ma patikiku kiahlahlahlamu ihlaku?
macuaku macarũmũ ia, ngahlaisa ma patikiku miasasara ihlaku? ihlaisa
ihlau inaku. maru ucani sipimia mavacangũ, siacalaia ina'a ia sihlangu,
maru ahla masarũmũana tumacacurunukia masunguli. siacalaia ina'ana ausi
matahlisau sahlumu, siacalaiana ausi mapuhli.

“ ngahlaisa ami maini siacalaiana kutuahlũ uvura siacalaia ina'a. ”
kainu, ulavaisa macahlia mamaini ahlaina. cucuari, manau siacalaia ina'ana,
marapihli siacalaia ina'a tuahlũ mũmũa macahlia siriatũnũla, umaru
sukuatitipa malũtũnũlũ ihlau—tam takualangũlangu inaku.

感恩

我從不懂得感恩。我生活在一個單親家庭裡，媽媽每天辛苦地工作，可我從不在乎。我的一切皆為母親給予，我卻不曾感激。我從不曾體會媽媽的辛苦！有天，媽媽臥病在床，我包攬家務，一天下來十分疲累，終於體會母親的辛苦、感受到母親對我付出的愛，我害怕媽媽突然離我而去。

有人說：「母親給予你的，你一生也還不了。」有句話說得好，母愛是陽光，母愛是清泉，今後，我將會在珍惜母愛，學會用行動回報！